

每週經課朗誦經文(巴克禮漢羅/教羅)2014/05/29

共同經課 - 1

使徒行傳一章一節~十一節

1 Thê-o-hui-lô ah, 我已經將耶穌 tù 起頭所行所教示 ê, 2 直到伊託重聖神命令所揀 ê 使徒了後受 chih 接上天 ê 日, tak 項記載 tī 前 ê 冊。3 伊受害了後, bat 用 choē-choē 憑據, tī 四十日 ê 中間, 出現 hō 使徒看見, 來顯明伊家已是活, 續講論上帝國 ê 事。4 伊 kap in 聚集 ê 時, 命令 in, 講, M̄-thang 離開耶路撒冷, tiòh thèng 候父所應允 ê, 就是 lín bat tù 我聽見 ê; 5 因為約翰用水行洗禮; 獨獨 lín, koh 無幾日, beh tī 聖神受洗。6 Án-ni in 聚集 ê 時, 問伊, 講, 主 ah, 你 tī chit 時 beh 將國復到 hō 以色列 mah? 7 伊就 kā in 講, 父所 hē tī 伊家已權內 ê 時 kap 期 m̄ 是 lín 所 thang 知。8 獨獨聖神臨到 lín ê 時, lín beh 得 tiòh 才能; koh tī 耶路撒冷, 遍猶太, kap 撒馬利亞, 直到地極, beh 做我 ê 干證。9 Chiah-ê 話講了, in teh 看 ê 時, 耶穌受舉起上天; 有雲 chih 接伊, in 就看 boē 見。10 伊去 ê 時, in òng 天注目看, 忽然有兩人穿白衫, khiā tī 身邊; 11 講, 加利利人 ah, 啥事 khiā-teh 看天? Chit-ê 耶穌離別 lín 受 chih 接上天, lín 看伊 án-ni 上天, 伊亦 beh 照 án-ni 來。

共同經課 - 2

詩篇四十七篇

1 Khó-láh 後裔 ê 詩; 交 hō 樂官。1) Lín 眾百姓 ah, lín lóng tiòh 搭手; Tiòh 用得勝 ê 聲, 大聲 o-ló 上帝。2 因為耶和華至高 ê, thang 驚 ê, 伊是大君王, 管理全地。3 伊 beh hō 萬百姓降服 tī 阮 ê 下面; 亦 beh hō 列邦 tī 阮 ê 腳下。4 伊 kā 阮揀阮 ê 產業, 就是伊所疼 ê 雅各 ê 榮光。[Sè-láh]5 上帝上去, 有 hoah ê 聲 tè 伊, 耶和華上去, 有號頭 ê 聲 tè 伊。6 Lín tiòh 唱歌, o-ló 上帝, tiòh 唱歌 o-ló; 唱歌 o-ló 咱 ê 王, tiòh 唱歌 o-ló; 7 因為上帝是全地 ê 王, Tiòh 用智慧唱歌 o-ló 伊。8 上帝做王治理萬國; 上帝坐 tī 伊聖 ê 寶座。9 列邦 ê 貴族聚集, beh 做亞伯拉罕 ê 上帝 ê 百姓; 因為世界 ê 藤牌是屬 tī 上帝; 伊是極高。

共同經課 - 3

以弗所書一章十五節~二十三節

15 因為 án-ni, 我既然聽見 lín 中間 tī 主耶穌 ê 信, kap 顯出 tī 眾聖徒 ê 仁愛, 16 就為 tiòh lín 感謝無 soah, 祈禱 ê 時 siàu 念 lín; 17 求咱 ê 主耶穌基督 ê 上帝, 榮光 ê 父, 賞賜 lín 智慧啟示 ê 神, 來深 bat 上帝; 18 lín ê 心目得 tiòh 光明, hō lín 知伊召人所 òng 望 ê 是怎樣, 伊 ê 業 tī 聖徒中榮光 ê 富有到怎樣, 19 koh 知伊 ê 權能 òng tī 咱 chiah-ê 信 ê 人大到怎樣, 20 照伊前所 bat 行 tī 基督大權能大氣力 ê 功用, hō 伊 tù 死人中 koh 活, tī 天裡坐伊 ê 大 pêng, 21 poān 過 lóng 總辦正事 ê, 掌權 ê, 才能 ê, 治理 ê, kap 一切所號 ê 名, m̄-nā tī 今世也 tī 來世, lóng poān 過遠遠; 22 koh hō 萬項有降服 tī 伊 ê 腳下, koh 將伊做管萬有 ê 頭, 來賞賜教會; 23 教會是伊 ê 身軀, 伊所充滿 ê; 伊也是用萬有充滿萬有 ê。

共同經課 - 4

路加福音二十四章四十四節~五十三節

44 Koh 對 in 講, Chiah-ê 就是我 iáu-kú kap lín tī-teh ê 時所對 lín 講 ê 話, 講見若 tī 摩西 ê 律法, kap hiah-ê 先知, 以及詩篇, 所記載指我 ê 話 lóng 的確 tiòh 應驗。45 就開 in ê 心竅, hō in 能曉悟 hiah-ê 聖經。46 Koh kā in 講, 有 án-ni 記載, 基督 tiòh 受苦, 第三日 tù 死人中 koh 活; 47 也反悔 kap 赦罪 ê 道理 beh tī 伊 ê 名來傳教萬邦, 是 tù 耶路撒冷起。48 Lín 做 chiah-ê tã-chì ê 干證。49 也我 beh 差我 ê 父所應允 ê 到 tī lín; 總是 lín tiòh tiàm tī chit-ê 城, thèng 候 tù 頂面落來 ê 權能親像衫 kā lín 穿。50 就 choā in 出去到伯大尼 ê 對面, kiáh 起手, kā in 祝福。51 祝福 ê 時, 就離別 in, 受 chih 接上天。52 In 就拜伊; 就 tò-tng 去耶路撒冷, 大大歡喜; 53 常常 tī 殿內, o-ló 上帝。